

## Bi bihotz

### USARRABI

1

Loretan daude sasiak  
haranak txuriz jantziak,  
erleak urrez josiak.  
Eliz dorreko gailurrerian  
zikoinak lasai jauziak.  
Enararen garraisiak  
txorrotxio horma-txoriak,  
eltxoen ehiztariak.

2

Errekarako bideska,  
eguzki galgaren kezka,  
oinez mutil eta neska  
Ertzetan zuhaitz eta sastraka,  
sargoriaren galdezka,  
osto soinua oleska,  
haize finari ezezka,  
eta alboan erreka.

3

Belazetan dena musker,  
kanta aspertuan kilker,  
doinu bera, mila bider,  
Txoko txokoan itzal gozoan  
isil-konturako eder,  
abaro onenaren bazter,  
egonean ezin asper  
eta urrutian galeper.

4

Osto adarren dardara,  
txori jolasen algara  
hego aizearen patxara.  
Behatz tartean urduri eta  
biotzean zer ikara.  
Esku txurien balada  
hitz aspertuen ilada,  
amodioaren aldaba.

5

Hitz ederrena ixila  
amodioen ezkila,  
bi bihotzetan dabila.  
Inguruetan zelai berdetan  
kanta aspertuan kirkila,  
esanahiak dira mila,  
bata bestearen bila,  
Ixila mintza dadila.

6

Ondorengo ilunabarra,  
maitearen deiadarra,  
nahi eta ezinaren marmara,  
Begiak piztu, eguzkia itzal  
ase ezinezko indarra,  
bat bestearen beharra,  
barneko su eta garra  
Ama-lurraren aparra.

7

Begira hor goiko hodeia  
izarren arteko leia,  
Joseba eta Mireia.  
Begi galduak, elkar bilduak  
lilura hutsezko deia.  
Ametsak eta ideiak;  
asma ezinezko adeiak,  
kimu berrien ezteiak.